

KERATAN AKHBAR

TARIKH : 26 JANUARI 2023
AKHBAR : SINAR HARIAN
MUKA SURAT : 2

Empat kementerian akan duduk semeja

Empat kementerian akan duduk semeja

Kerajaan bakal umum strategi baharu atasi kos sara hidup

Oleh **TUAN BUQHAIRAH TUAN MUHAMAD ADNAN PUTRAJAYA**

Kerajaan menerusi kerjasama empat kementerian sedang merangka strategi baharu sebagai usaha mengatasi isu kos sara hidup yang semakin menekan rakyat.

Menteri Ekonomi, Rafizi Ramli berkata, ia membabitkan pelan strategi jangka pendek dan panjang yang akan diumumkan dalam masa terdekat.

"Antaranya adalah (isu) rantaian makanan dan menambah sumber bekalan di dalam negara," katanya semasa sidang akhbar di kementeriannya di sini pada Rabu.

Turut hadir Ketua Perangkawan, Datuk Seri Dr Mohd Uzir Mahidin.

Menurut Rafizi, kementeriannya dengan kerjasama Kementerian Perdagangan Dalam Negeri dan Sara Hidup (KPDN); Kementerian Pertanian dan Keterjaminan Makanan (MAFS); dan Kementerian Kewangan (MOF) serta agensi berkaitan sedang meneliti langkah ke arah jaminan bekalan makanan bagi memenuhi permintaan seterusnya membantu mengawal kenaikan harga.

Beliau memberi contoh peningkatan harga akibat permintaan tinggi terhadap cili Vietnam dalam tempoh dua bulan lalu dan perkara itu boleh diatasi dengan penanaman cili secara komersial.




FOTO: BERNAMA

Kerajaan wajar mengumumkan rancangan yang signifikan untuk mengatasi isu kos sara hidup yang semakin membebankan rakyat ketika ini.



RAFIZI

"Dari segi pelaksanaan, perlu dipastikan agar kita tidak hanya suruh orang tanam cili semata-mata tetapi perlu menyediakan pasaran buat petani," jelasnya.

Rafizi berkata, terdapat beberapa projek perintis yang dilakukan kerajaan dan bakal diperluas ke seluruh negara melalui strategi tersebut namun ia menggunakan pendekatan berbeza daripada kelaziman.

"Selalunya kalau diberikan insentif, ia cukup untuk tanam sahaja, selepas itu pandai-pandailah dia (petani). Saya tidak yakin perkara itu akan membantu kelangsungan mereka yang terlibat," katanya.

Ujar beliau, dalam usaha mewujudkan rantaian bekalan makanan yang stabil, kerajaan akan turut melibatkan golongan miskin tegar agar mereka mempunyai pendapatan tambahan dalam aktiviti berkaitan rantaian makanan.

"Kita akan pastikan (produk) mereka mempunyai permintaan tetap," katanya.

Ditanya adakah kerajaan sedia bekerjasama dengan syarikat berkaitan kerajaan (GLC) dan pengendali koridor ekonomi, Rafizi berkata: "Pengendali koridor ekonomi seperti Iskandar Malaysia, Wilayah Ekonomi Pantai Timur (ECER) dan Wilayah Ekonomi Koridor Utara (NCER) sudah mendapat arahan dan mandat ini adalah tumpuan utama."

Beliau menjelaskan, agensi pelaksana kini sedang dalam proses untuk mengembangkan lagi projek yang berkaitan dengan nilai rantaian makanan.

"Mereka juga sedang mengenal pasti tanaman baharu untuk dipadankan dengan tanah, penerima, pengusaha dan pembeli," beritahu Rafizi.

Tambah beliau, beberapa cadangan berkaitan pelaburan berimpak tinggi dalam sektor-sektor makanan terutama yang bersifat hulu akan dijangka dikemukakan oleh GLC kepadanya.

"Kita sudah duduk berbincang dan sedang menunggu mereka kembali dengan beberapa cadangan," katanya.